

Aruba completo ta enbusca di Natalee

Y ta bibando den momentonan di tension ya cu Aruba no ta conoci pa casonan

ORANJESTAD (AAN)- Kico a pasa e Dialuna marduga di 30 di Mei caminda a drenta e noticia cu un hoben Mericano ta perdi te ainda ta un misterio, pero sigur el a pone cu henter Aruba ta pendiente di e incidente aki cu a pone Aruba den pantaya internacional.

E caso aki ta uno cu a capta hopi atencion ya cu ta di e hoben Natalee Holloway cu a bin pasa algun dia di vacacion na Aruba despues di un otro aña escolar y no a regresa su pais bek hunto cu su amiganan.

E noticia aki for di Diamars cu el a sali den corantnan como tambe na radio emisoranan na Aruba, a acapara tur atencion y caminda a pone cu tur hende ta pendiente pa sa kico a pasa y si nan a haya e mucha muher. Tipnan tabata drenta via central di polis y cerca fami-

anan pero nada te ainda segun nos por a compronde no ta nada concreto y cu nan a logra haya e mucha muher. Famianan dia pa dia ta bibando mas den tension ya cu for di tur e informacionnan, nan mes tabata sali tambe y yuda busca pero no por a haya ni sikiera algo cu por identifica nan ser queri.

Por a compronde cu tur autoridadnan concerni na Aruba ta trahando ariba e caso aki y hasta tin voluntarionan cu ta yuda unda cu nan por pa asina yuda e famia aki haya nan ser queri bek pasobra e ta un situacion hopi fastioso y tristo caminda for di Diamars nan no ta hayando ningun informacion di dje.

E noticia aki tambe a capta atencion internacional ya cu por haya na tur canal di television mericano como tambe den corantnan di exterior.



Esaki quizas lo por trece nos pais den un luz negativo ya cu Aruba ta conoci pa "One Happy Island" pero no un pais como "kidnapping island".

Informacionnan cu

DIARIO ta ricibiendo ta pidi cu ohala cu tur cos sali bon di e caso aki y e famianan por regresa nan pais feliz di por a haya nan yiu sano y salvo.

DIARIO cu ta siguiendo e caso aki for di Diamars mainta caminda e mama y algun familiar tabata na

redaccion pa pidi ayudo pa busqueda di nan yiu, ta pendiente di cualquier noticia pa asina trece pa su lectornan y pa e pueblo por ta tranquil atrobe, ya cu ultimo dianan por a compronde cu e pueblo di Aruba ta den un incertidumbre completo pendiente di noticia di e hoben Natalee.